

MPN/gr

**ACTA DA SESIÓN ORDINARIA DA COMISIÓN INFORMATIVA DE COOPERACIÓN LOCAL, TRANSFRONTEIRIZA E DE COORDINACIÓN DAS EMERXENCIAS PROVINCIAIS DO DÍA 17/11/2023**

ASISTENTES

PRESIDENTE:	D. José Carlos López Campos
SUPLENTE	D. Roberto José Álvarez Carrero
VOGAIS:	D <sup>a</sup> . Javier Tourís Romero, en substitución de D <sup>a</sup> . Marta Fernández-Tapias Núñez
	D. Rafael Domínguez Artime
	D. Jorge Cubela López
	D. Jesús Vázquez Almuíña
	D. <sup>a</sup> María Pilar Ramallo Vázquez
	D. Manuel Alejandro Lorenzo Alonso
	D. <sup>a</sup> María Nava Castro Domínguez
	D. Carlos López Font
	D. Carlos Gómez Prado
	D. <sup>a</sup> Ana Laura Iglesias González
	D. <sup>a</sup> Digna Rosa Rivas Gómez
	D. Gregorio Luis Agís Gómez
	D. Javier Iglesias Mougán
	D. Xosé Cesáreo Mosquera Lorenzo
	D. <sup>a</sup> Beatríz Lomba Rodríguez

Sendo as doce horas e cinco minutos do día dezasete de novembro do ano dous mil vinte e tres, reúnense no Pazo Provincial os Sres./as. Deputados/as arriba relacionados, en sesión ordinaria, e baixo a Presidencia de D. José Carlos López Campos. Actúa como secretaria a xefa do Servizo de Cooperación, D<sup>a</sup> Marina Piñeiro Novo.

Aberta a sesión polo Presidente, pásase ó estudo dos asuntos incluídos na Orde do Día, sobre os que recaeron os seguintes ditames:

**1.- APROBACIÓN DA ACTA DA SESIÓN ANTERIOR**

Apróbese a acta da sesión anterior correspondente á sesión ordinaria celebrada o vinte de outubro do ano dous mil vinte e tres co voto favorable de todos os membros da Comisión.



## 2.- DITAMINAR A APROBACIÓN DA PRÓRROGA DO PLAN CONCELLOS 2022-2023, ANUALIDADE 2022

De conformidade co establecido nos artigos 123 e 126 do Real decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais, antes da súa elevación ao Pleno, sométese ao ditame da Comisión Informativa de Cooperación Local, Transfronteiriza e de Coordinación das Emerxencias Locais a seguinte **proposta de acordo**:

“O Plan Concellos 2022-2023, aprobado polo Pleno da Corporación provincial no seu acordo núm. 9.7707, de 26 de novembro de 2021, establece na súa base 21.<sup>a</sup> que os investimentos incluídos na anualidade 2022 deberán estar executados o 31 de decembro de 2023 e xustificados na súa totalidade o 31 de marzo de 2024. Non obstante, na data actual hai 228 investimentos pendentes de xustificar dun total de 366, ademais de encontrárense en trámite diversas actuacións relativas a pagamentos ou á substitución de proxectos subvencionables por outras actuacións que se estiman máis convenientes para os intereses do concello.

Debido a diversos motivos que determinados concellos lle expuxeron a esta Deputación, coma a falta de persoal, a demora na obtención das autorizacións administrativas ou dos permisos necesarios para executar as obras, a reformulación dos proxectos técnicos presentados coas solicitudes como consecuencia do cumprimento das cautelas impostas pola normativa sectorial e os procedementos de licitación que quedaron desertos polo incremento dos prezos das materias primas e que obrigaron a habilitar novos procedementos de contratación, non está sendo posible cumprir o horizonte temporal recollido nas bases reguladoras para os investimentos acollidos na Liña 1 da anualidade 2022.

Ás circunstancias desfavorables citadas no parágrafo anterior hai que engadirlle a paralización *de facto* da actividade administrativa con motivo da celebración das eleccións municipais de maio de 2023, a causa das limitacións legais propias dos períodos electorais, e a minoración da celeridade dos procesos de toma de decisións que implica o proceso de renovación das corporacións locais, polo que os concellos se atopan con novas dificultades para rematar a execución das obras nos citados prazos.

Ademais, o Plan Concellos 2022-2023 recolle nas súas bases 17.<sup>a</sup> e 19.<sup>a</sup> a posibilidade de modificar os acordos e as resolucións de concesión cando concorran circunstancias excepcionais e os reinvestmentos das baixas producidas na mesma obra ou noutra distinta.

A propia natureza dos cambios de aplicación, que se producen de modo excepcional e non poden ser previstos na concesión, así como a tramitación de baixas das que, en principio, non se pode dar conta ata a finalización do procedemento de xustificación do investimento primixenio, implican un horizonte temporal máis longo do que se pode prever na concesión orixinal. Ademais, estes casos supoñen unha tramitación administrativa idéntica ás concesións orixinais, polo que semella difícil que todas elas se poidan realizar, executar e xustificar no prazo previsto inicialmente no plan.



A pesar de que non todos os concellos presentaron a solicitude de prórroga, estímase convinte facerlles extensiva a ampliación do prazo a todos os beneficiarios do plan por canto, en maior ou menor medida, todos se viron afectados pola mesma problemática. Deste modo, garántese a igualdade de trato e de condicións de execución e xustificación dos investimentos subvencionados.

## FUNDAMENTOS DE DEREITO

Primeiro. Conforme se establece na base 2.<sup>a</sup> do Plan Concellos 2022-2023, as axudas que se arbitren a favor dos concellos rexeranse polo recollido nas propias bases reguladoras. Con todo, para o non previsto nelas aplicaranse supletoriamente a Lei 38/2003, de 17 de novembro, xeral de subvencións (LXS), o Real decreto 887/2006, de 21 de xullo, polo que se aproba o Regulamento da LXS (RLXS), a Ordenanza xeral de subvencións da Deputación Provincial de Pontevedra (OXSDEPO) e as restantes normas de dereito administrativo e, no seu defecto, as normas de dereito privado.

Nas bases reguladoras do Plan Concellos 2022-2023 non se recolle unha previsión expresa respecto da ampliación dos prazos de execución e, no seu caso, de xustificación dos investimentos subvencionados. Non obstante, no artigo 70 do RLXS (de aplicación supletoria) establécese que, salvo precepto en contrario nas bases reguladoras, o órgano concedente da subvención poderá acordar unha ampliación do prazo de presentación da xustificación que non exceda a metade deste.

As condicións e o procedemento para a concesión da ampliación serán os establecidos no artigo 32 da Lei 39/2015, de 1 de outubro, do procedemento administrativo común das administracións públicas (LPACAP), no que se estipula que a ampliación, se as circunstancias así o aconsellan, deberá producirse antes do vencemento do prazo que se vai ampliar, sempre que non se prexudiquen dereitos de terceiras persoas e por un prazo que non exceda a metade do inicial.

Conforme o antedito, ao estimar xustificada a imposibilidade de realizar as obras subvencionadas no prazo de execución establecido, e tomando como referencia para o cómputo o prazo do que dispoñían os concellos desde a finalización do prazo de presentación das solicitudes; é dicir, o 3 de marzo de 2022, ata o límite máximo de execución previsto nas bases reguladoras, o 31 de decembro de 2023, poderíase estender o prazo de execución ata o 30 de setembro de 2024 e o prazo de xustificación ata o 31 de outubro de 2024.

Segundo. En todo expediente de contido económico conflúen dous tipos de normas: de legalidade substantiva e de legalidade financeira, aplicables ás diferentes actuacións da Administración.

Desde o punto de vista xurídico, establécese que todos os actos deben ser sempre adoptados polo órgano competente. Desde o punto de vista económico, como se recolle no Real decreto legislativo 2/2004, de 5 de marzo, polo que se aproba o Texto refundido da Lei reguladora das facendas locais (TRLRFL), o órgano competente deberá adoptar os actos



de autorización, disposición, recoñecemento da obriga e proposta de pagamento no momento oportuno do procedemento.

A execución dos acordos de concesión e o libramento do crédito implican que previamente as actuacións subvencionadas deben estar rematadas na súa totalidade e xustificadas. Na conxuntura actual isto non será posible se os créditos comprometidos na anualidade 2022 do Plan Concellos 2022-2023 non se incorporan ao exercicio orzamentario 2024 e non se estende, polo tanto, a vixencia do plan.

De acordo co disposto nos artigos 182 do TRLRFL e 34 e seguintes do Real decreto 500/1990, de 20 de abril, os créditos do exercicio 2022 do Plan Concellos 2022-2023 poderíanse incorporar ao orzamento de 2024, previa tramitación do correspondente expediente de incorporación de remanentes de crédito, unha vez aprobada a liquidación do Orzamento xeral de 2023.

Terceiro. O procedemento de concesión das subvencións no marco do Plan Concellos 2022-2023, na anualidade 2022, foi **o de concorrencia non competitiva**, ao abeiro do recollido nas propias bases reguladoras e segundo o disposto no artigo 22 da LXS.

Nun procedemento de concesión de subvencións por concorrencia non competitiva, as solicitudes non se comparan entre si nin son obxecto dunha cuantificación ou valoración. No caso do Plan Concellos, a repartición dos incentivos económicos prodúcese con base nunha repartición aprobada polo Pleno, sempre e cando os concellos beneficiarios e as solicitudes presentadas cumpran as condicións establecidas nas bases reguladoras.

En consecuencia, a ampliación dos prazos non lle afecta á asignación do crédito entre os beneficiarios, non produce indefensión, non prexudica dereitos de terceiras persoas nin vulnera o principio de igualdade recollido no artigo 8 da LXS, posto que todos os concellos da provincia se benefician por igual da prórroga e da cooperación administrativa da Deputación.

Cuarto. Segundo a base 3.<sup>a</sup> das reguladoras do Plan Concellos 2022-2023, o órgano competente para a aprobar estas bases foi o Pleno da Deputación, polo tanto será o mesmo órgano o competente para modificar a base 21.<sup>a</sup>, no referido á ampliación do prazo de execución e xustificación dos investimentos acollidos na Liña 1.

Visto todo o anterior, considérase que, ao cumprirse o recollido en puntos anteriores, debería permitirse a aplicación dos créditos comprometidos dentro da Liña 1 do Plan Concellos 2022-2023, na anualidade 2022, ata que se cumpran as actuacións subvencionadas, sen exceder, en todo caso, o 31 de outubro de 2024, dado que as circunstancias así o aconsellan e con iso non se prexudican dereitos de terceiras persoas.

Á vista dos antecedentes e consideracións expostas; con base na documentación relativa ao citado plan que obra no expediente, e de acordo cos informes da xefa do Servizo de Cooperación (CSV: DUCS20GK273A5TGG), da Intervención provincial (CSV: FFCBD5TNTQ7BS7B9) e da Secretaría xeral (CSV: BIMMQO11VYAA200) nos que se lle presta conformidade á proposta do Servizo de Cooperación, propónse a adopción do seguinte acordo; de conformidade cos artigos 33 da Lei 7/1985, de 2 de abril, reguladora



das bases do réxime local, e 70 do Real decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das entidades locais.

- 1.º. PRORROGAR o prazo para solicitar as subvencións por reinvestimento de baixas ou cambios de finalidade, ata o 31 de maio de 2024.
- 2.º. PRORROGAR o prazo de execución dos investimentos incluídos na Liña 1, Investimentos, do Plan Concellos 2022-2023, anualidade 2022, ata o 30 de setembro de 2024.
- 3.º. PRORROGAR o prazo de xustificación dos investimentos incluídos na Liña 1, Investimentos, do Plan Concellos 2022-2023, anualidade 2022, ata o 31 de outubro de 2024.”

Sometido a votación este asunto, a Comisión Informativa de Cooperación Municipal, Transfronteiriza e de Coordinación das Emerxencias Provinciais, ditamina favorablemente, cos votos a favor dos/as deputados/as do Grupo Provincial do PP (9) e do Grupo Provincial do BNG (2), e a abstención do Grupo Provincial do PSdeG-PSOE (6).

### **3.- DITAMINAR A APROBACIÓN DA ADDENDA PARA PRORROGAR A VIXENCIA DO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO (Expediente 2021036318)**

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ó Ditame da Comisión Informativa de Cooperación Municipal, Transfronteiriza e de Coordinación das Emerxencias Provinciais a seguinte proposta de acordo con carácter previo á súa elevación ante o Pleno para a súa aprobación:

**“ASUNTO: APROBACIÓN DA ADDENDA PARA PRORROGAR A VIXENCIA DO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO (EXPEDIENTE 2021036318)**

#### **ANTECEDENTES**

- No exercicio das súas atribucións, a Deputación Provincial de Pontevedra e o Concello de Pontevedra teñen o obxectivo compartido da creación dun novo viario de circunvalación de acceso ao futuro Hospital Gran Montecelo, que actuará, a modo de by-



pass, como unha variante ao tráfico que actualmente circula pola avenida de Montecelo, coa finalidade de facilitar a circulación, os accesos rodados e os peonís ao novo equipamento hospitalario, para que poida atender axeitadamente a demanda de mobilidade que poida xerarse coa construción do novo centro hospitalario e a dotación de infraestruturas e servizos urbanos necesarios.

- Para dar cumprimento ao obxectivo referido no parágrafo anterior, a Deputación Provincial de Pontevedra e o Concello de Pontevedra estableceron as pautas de colaboración para levar a cabo o “NOVO VIARIO AMPLIACIÓN HOSPITAL GRAN MONTECELO” e así, en data 24/09/2021 o Pleno da Corporación Provincial, na súa sesión ordinaria, adoptou o acordo núm. 6.7672 polo que se aprobou o “CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE A INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO” no que se establece un orzamento de 1.369.951,30 € e cuxa financiación corresponde integramente á Deputación, correspondendo a cantidade de 700.000,00 € á anualidade 2021 e 669.951,30 € á anualidade 2022. O convenio foi asinado polas partes en data 22/10/2021.
- En data 27/10/2023, con núm. de rexistro WEB2023059723, o Concello de Pontevedra solicita a convocatoria dunha reunión da Comisión de Seguimento, co obxecto de valorar a conveniencia de prorrogar a vixencia do mesmo ao preverse por parte do Concello que non será posible a execución e finalización no prazo estipulado na cláusula décima do convenio, isto é, o 31/12/2023.
- En data 02/11/2023 reúnese a Comisión de Seguimento deste Convenio de colaboración e, á vista do estado de execución real, e tendo en conta a necesaria suspensión da obra de “EVACUACIÓN DAS AUGAS RESIDUAIS E PLUVIAIS DA AMPLIACIÓN DO HOSPITAL DE MONTECELO”, obxecto dun convenio de cooperación entre o Concello de Pontevedra e a Consellería de Sanidade e o SERGAS, que repercute na execución do “NOVO VIAL A MONTECELO”, xa que interfere de cheo no seu trazado, que fai imposible o remate das obras comprometidas a día 31/12/2023, acorda por unanimidade prorrogar o prazo de vixencia do convenio ata o 31/12/2024, mantendo o resto das cláusulas do convenio.
- A cláusula décima do convenio contempla que no caso de imposibilidade de remate das obras ou xustificación nos prazos referidos, as partes poderán acordar a ampliación dos mesmos ata o 31/12/2024.
- Na data 06/11/2023 a xefa do Servizo de Cooperación informa a proposta de addenda e, pola súa banda, a Intervención provincial emite informe favorable o día 08/11/2023.
- Sométese ao ditame da Comisión Informativa de Cooperación Local, Transfronteiriza e de Coordinación das Emerxencias Provinciais a aprobación da addenda para prorrogar a vixencia do citado convenio.

## FUNDAMENTOS XURÍDICOS

### Lexislación aplicable

- Lei 38/2003, de 17 de novembro, Xeral de Subvencións (LXS), e o seu Regulamento, aprobado por Real Decreto 887/2006, de 21 de xullo (RLXS)



- Lei 7/1985, de 2 de abril, Reguladora das Bases do Réxime Local (LRBRL)
- Lei 5/1997, de 22 de xullo, reguladora da Administración Local de Galicia (LALGA)
- Lei 39/2015, de 1 de outubro, do Procedemento Administrativo Común das administracións públicas (LPACAP)
- Lei 40/2015, de 1 de outubro, do Réxime Xurídico do Sector Público (LRXSP)
- Lei 9/2017, de 8 de novembro, de Contratos do Sector Público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 (LCSP)
- Lei 9/2007, de 13 de xuño, de Subvencións de Galicia (LSG)
- Real Decreto 2568/1986, de 28 de novembro, polo que se aproba o Regulamento de Organización, Funcionamento e Réxime Xurídico das Entidades Locais (ROFRXEL)
- Bases de execución do vixente orzamento da Deputación
- Ordenanza Xeral de Subvencións da Deputación de Pontevedra (Ordenanza Xeral)
- Convenio de colaboración entre a Deputación e o Concello de Pontevedra sobre infraestrutura viaria e de servizos para a ampliación do hospital de Montecelo.

### **Consideracións xurídicas**

#### **Competencia**

- Artigo 25.2.d) da LRBRL, en concordancia co artigo 80.2.d) da LALGA que atribúe ás administracións municipais a competencia en materia de infraestrutura viaria e outros equipamentos da súa titularidade, así como da ordenación, xestión, execución e disciplina urbanística; a promoción e xestión de vivendas; os parques e xardíns; a pavimentación de vías públicas urbanas e a conservación de camiños e vías rurais.
- Artigo 31 da LRBRL, que encomenda ás deputacións que dirixan a súa actividade a asegurar a prestación integral e adecuada dos servizos de competencia municipal, recolléndose no seu artigo 36 como competencia propia das deputacións a asistencia e cooperación económica aos concellos. A estes efectos, a Deputación asegura o acceso da poboación da provincia ao conxunto dos servizos mínimos de competencia municipal mediante calquera fórmula de asistencia e cooperación municipal, para o que poderá outorgar subvencións ou axudas con cargo aos seus recursos propios para a realización e mantemento de obras e servizos municipais.

#### **Petición e evacuación de informes**

- Artigos 79 e 80 da LPACAP sobre a petición e a evacuación de informes.
- Artigo 88.6 da LPACAP, que sinala que a aceptación de informes ou ditames servirá de motivación á Resolución cando se incorporen ao texto da mesma.
- Artigos 213 e ss. do TRLRFL, sobre o control e a fiscalización da xestión económica que lle corresponde realizar á Intervención.
- Artigo 172 do ROFRXEL, que dispón que o xefe da Dependencia á que corresponda tramitar o expediente deberá emitir un informe, expoñendo os antecedentes e as disposicións legais ou regulamentarias en que funde o seu criterio.
- Bases 47ª e 48ª de execución do vixente orzamento provincial, sobre o control e a



fiscalización da xestión económica, que sinalan a competencia da Intervención para realizar esta función.

- Artigo 24 da LXS que establece que as actividades de instrución comprenderán, entre outras, a petición de cantos informes se estime necesarios para resolver ou que sexan esixidos polas normas que regulan a subvención.

#### **Procedencia da addenda**

- Artigo 49.f) da LRXSP que recolle como contido mínimo dos convenios os mecanismos de seguimento, vixilancia e control da execución do convenio e dos compromisos adquiridos.
- Artigo 49.h.2º) da LRXSP, que establece como regra ao respecto da vixencia dos convenios, que en calquera momento antes da finalización do prazo de vixencia do convenio, os asinantes poderán acordar unanimemente a súa prórroga por un período de hasta catro anos adicionais.
- Cláusula 10ª do convenio, que indica que no caso de imposibilidade de remate das obras ou xustificación nos prazos referidos, as partes poderán acordar a ampliación dos mesmos ata o 31/12/2024.

#### **Competencia para resolver**

- A competencia correspóndelle ao Pleno da Deputación, de acordo coa Base 16ª de execución dos orzamentos da Deputación para o vixente exercicio, en virtude do artigo 33 da LRBRL e do 185 do TRLRFL.

#### **CONCLUSIONES**

Por todo o exposto, e en base ás precedentes consideracións e ao interese público que representa esta actuación para a cidade de Pontevedra, da veciñanza e resto de potenciais visitantes da cidade, e visto que o convenio se atopa vixente e que a addenda solicitada non excede dos límites establecidos pola lexislación aplicable, visto que as circunstancias o aconsellan e con iso non se prexudican dereitos de terceiros, INFORMO FAVORABLEMENTE a sinatura dunha “ADDENDA PARA PRORROGAR A VIXENCIA DO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO” a fin de dar continuidade ao convenio asinado, estendendo a súa vixencia ata o día 31/12/2024.

Este informe non ten carácter vinculante, de feito que o órgano concedente co seu superior criterio decidirá.

Á vista dos informes da xefa do Servizo de Cooperación e da Intervención Provincial; elévase á Comisión Informativa de Cooperación Municipal, Transfronteiriza e de Coordinación das Emerxencias Provinciais, a seguinte PROPOSTA DE ACORDO:

- APROBAR a “ADDENDA PARA PRORROGAR A VIXENCIA DO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO”.





Non obstante, a presente aprobación queda condicionada á aprobación da addenda por parte do Concello de Pontevedra.

O texto da addenda literalmente transcrito di como segue:

*“ADDENDA PARA PRORROGAR A VIXENCIA DO CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO*

*Na data da sinatura electrónica*

#### **INTERVEÑEN**

*Dunha banda, D. Luis López Diéguez, na súa condición de presidente da Deputación Provincial de Pontevedra, actuando en virtude das competencias que lle atribúe o artigo 34.1.b) da Lei 7/1985, de 2 de abril, reguladora das bases de réxime local.*

*E doutra parte, D. Miguel Anxo Fernández Lores, alcalde do Concello de Pontevedra, actuando en virtude das facultades que lle atribúe o artigo 124.1 e 124.4 da Lei 7/1985, de 2 de abril, reguladora das bases de réxime local.*

*Actúan D. José Carlos Castiñeira Piñeiro, en calidade de secretario do Concello de Pontevedra, e D. Carlos Cuadrado Romay en calidade de secretario da Deputación Provincial de Pontevedra, dando fe do acto que se celebra.*

*Ámbalas dúas partes actúan nas representacións expresadas e recoñécense reciprocamente capacidade bastante para o outorgamento e formalización desta addenda, con base nos principios de colaboración, cooperación, coordinación e eficacia que deben presidir as actuacións das Administracións Públicas e, de común acordo,*

#### **EXPOÑEN**

*I.- Que con data de 22 de outubro de 2021 asinouse o CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO.*

*II.- Que o convenio asinado, na súa cláusula DÉCIMA, indica que:*

*“O investimento obxecto deste Convenio deberá estar executado e finalizado na data límite do 31/12/2023, fixándose un prazo de xustificación ata o 30/04/2024.*

*No caso de imposibilidade de remate das obras ou xustificación nos prazos referidos, as partes poderán acordar a ampliación dos mesmos ata o 31/12/2024.*

*O presente convenio producirá os seus efectos desde a data da súa sinatura ata a total execución dos contratos aos que o mesmo se refire, ou vencemento do prazo máximo inicial ou prorrogado previsto neste Convenio.”*

*III.- Que a cláusula NOVENA do mesmo convenio prevé unha Comisión de Seguimento e Control para o seguimento e control do cumprimento do presente convenio, así como para aclarar as dúbidas que poidan producirse na súa interpretación.*

*IV.- Que o día 2 de novembro de 2023 a dita Comisión reúnese con motivo de non ser posible a realización das actuacións previstas no prazo de execución e finalización de*



obra estipulado na cláusula DÉCIMA, isto é, o 31/12/2023, por mor da suspensión temporal dun convenio de cooperación entre o Concello e a Consellería de Sanidade e o SERGAS cuxa obra interfere de cheo no seu trazado coa obra do novo vial a Montecelo, obxecto do presente convenio coa Deputación, polo que se acorda por unanimidade prorrogar a vixencia do convenio ata o 31 de decembro de 2024, co obxecto de adecuar o convenio as necesidades de execución real das obras.

V.- Por todo o anteriormente exposto, ambas as partes manifestan expresamente o seu propósito de asinar unha addenda co obxecto de proceder á adecuación temporal do “Convenio de colaboración entre a Deputación Provincial de Pontevedra e o Concello de Pontevedra sobre infraestrutura viaria e de servizos para a ampliación do hospital de Montecelo” conforme ás seguintes

#### CLÁUSULAS

*PRIMEIRA.- A Deputación Provincial de Pontevedra e o Concello de Pontevedra acordan adecuar o prazo de vixencia do “CONVENIO DE COLABORACIÓN ENTRE A DEPUTACIÓN PROVINCIAL DE PONTEVEDRA E O CONCELLO DE PONTEVEDRA SOBRE INFRAESTRUTURA VIARIA E DE SERVIZOS PARA A AMPLIACIÓN DO HOSPITAL DE MONTECELO”, ampliándose o mesmo ata o día 31 de decembro de 2024, data na que deberá estar executada e xustificada a actuación.*

*SEGUNDA.- En todo o demais, o texto do convenio asinado en data 22 de outubro de 2021 mantense invariable, suxeitándose as partes ao seu clausulado.*

*E para que así conste, en proba de conformidade, as partes que interveñen asinan a presente addenda na data da sinatura electrónica.”*

- FACULTAR ao presidente para formalizar a devandita addenda ao convenio mediante a súa sinatura.
- DAR TRASLADO do presente acordo ao Concello de Pontevedra, á Intervención, ao Servizo de Cooperación, ao Gabinete da Presidencia e ao Gabinete de Prensa.”

Sometido a votación este asunto, a Comisión Informativa de Cooperación Municipal, Transfronteiriza e de Coordinación das Emerxencias Provinciais, ditamina favorablemente, cos votos a favor dos/as deputados/as do Grupo Provincial do PP (9) e do Grupo Provincial do BNG (2), e a abstención do Grupo Provincial do PSdeG-PSOE (6).

#### **4.- MOCIÓN DO GRUPO PROVINCIAL SOCIALISTA PARA RECLAMAR DA DEPUTACIÓN O TRASPASO DOS 4 MILLÓNS DE EUROS DO PLAN EXTRAORDINARIO DE INFRAESTRUTURAS DEPORTIVAS A UN PLAN DE AXUDA URGENTE AOS CONCELLOS AFECTADOS POLOS TEMPORAIS DO MES DE OUTUBRO**

De conformidade co establecido nos artigos 123 a 126 do Real Decreto 2568/1986, de 28 de novembro, polo que se aproba o Regulamento de organización, funcionamento e réxime xurídico das Entidades Locais, sométese ao Ditame da Comisión Informativa de



Cooperación Municipal, Cooperación Transfronteiriza e Cohesión Social a seguinte moción con carácter previo a súa elevación ó Pleno:

*“O Grupo Socialista na Deputación de Pontevedra, ao amparo da lexislación vixente, presenta a seguinte moción para o seu debate e votación en Pleno:*

#### **EXPOSICIÓN DE MOTIVOS**

*A provincia de Pontevedra foi a máis castigada pola cadea de temporais que varreron Galicia durante o mes de outubro e o que vai de novembro. Os danos son tan cuantiosos e están repartidos por tantos concellos que mesmo podemos consideralos como unha emerxencia de carácter provincial. Os estragos en algúns concellos concretos xa foron valorados inicialmente en máis dun millón de euros.*

*Asistimos a chamadas desesperadas de auxilio de varios alcaldes e alcaldesas da provincia, impotentes para atender tódolos efectos causados pola choiva, o vento e as inundacións causadas polos ríos e a forza do mar. A Deputación vai deixalos abandonados/as?*

*Os datos amosan que no mes de outubro batéronse tódolos rexistros históricos de precipitacións, con concellos onde se superaron mesmo os 800 litros por metro cadrado. As emerxencias atendidas ao longo do mes cóntanse por milleiros. O nunca visto. Os refachos de vento superaron os 100 Km hora en numerosas ocasións. Resulta complicado atopar un só concello desta provincia no que os servizos públicos municipais non teñan sido prexudicados. Hai casos especialmente urxentes, con servizos que se prestan á veciñanza que van tardar meses en ser repostos.*

***Unha catástrofe sen precedentes recentes. Unha situación de emerxencia de primeira magnitude, diante da que, como é habitual, a Xunta de Galicia reacciona con silencio, como se nada tivera ocorrido, a pesar de ter as competencias plenas en materia de emerxencias de protección civil na nosa comunidade. Tócalle, por tanto, á Deputación volver dar a cara por esta provincia.***

*En xaneiro deste mesmo ano, o Pleno da Deputación de Pontevedra aprobou un acordo unánime para poñer en marcha un Plan de Axudas polos temporais de decembro e xaneiro dotado con 2,7 millóns de euros. Foi froito dunha rectificación de última hora do grupo provincial do PP, que votou inicialmente en contra e logo, diante da advertencia da anterior presidenta de que estaba votando en contra de que a Deputación repartise recursos, cambiou o voto. A anterior Deputación estivo, por tanto, á altura, a pesar de tratarse dunha competencia autonómica recollida expresamente na Lei de Emerxencias de Galicia.*

*Agora toca volver dar a cara por esta provincia. A cadea de temporais deste pasado mes de outubro é, sen dúbida, moito máis grave que a anterior, tanto pola intensidade como polo territorio afectado. Se en xaneiro o epicentro dos danos situábase na comarca do Baixo Miño e no Val Miñor, desta volta podemos falar de efectos devastadores por toda a provincia.*

***O Goberno actual aprobou unha modificación de crédito de 4 millóns de euros no último Pleno ordinario para financiar un Plan Extraordinario Infraestruturas Deportivas. Este Plan carece aínda de bases e convocatoria, polo que estamos a tempo de reorientar eses recursos para o que realmente precisan os concellos nestes momentos, que é un Plan de Axuda polos Danos dos Temporais. O importe de 4 millóns de euros é totalmente insuficiente para construír instalacións deportivas en toda a provincia,***




*pero estes recursos serían valiosos se se dedican a aliviar aos concellos, axudándoos a restablecer os servizos municipais afectados.*

### **É MOMENTO DE ATENDER AS PRIORIDADES EN LUGAR DA PROPAGANDA.**

*Por todo elo, o Pleno da Deputación de Pontevedra adopta os seguintes:*

#### **ACORDOS:**

- 1. Instar ao Goberno provincial a tramitar unha modificación de crédito urxente para traspasar integramente os 4 millóns de euros do Plan Extraordinario de Infraestruturas Deportivas a un Plan de Axuda polos Temporais de outubro e novembro.*
- 2. Dotalo dunhas bases obxectivas que resarzan aos concellos en función dos índices de choiva, intensidade dos refachos de vento e, especialmente, danos provocados por inundacións, tanto por desbordamento dos ríos como polos embates do mar no litoral.*
- 3. Facer compatibles esas subvencións aos concellos con calquera outras que puideran aprobar os gobernos de España ou de Galicia.*



*Carlos López Font*

*Voceiro do grupo provincial socialista*

*Novembro de 2023 ”*

Sometido a votación este asunto, a Comisión Informativa de Cooperación Local, Transfronteiriza e de Coordinación das Emerxencias Provinciais, ditamina desfavorablemente a referida moción cos votos en contra dos/das deputados/as do Grupo Provincial do Partido Popular (9), os votos a favor dos/das deputados/as do Grupo Provincial do PSdeG-PSOE (6) e a abstención do Grupo Provincial do BNG (2).

### **5.- ROGOS E PREGUNTAS**

Non houbo.

E non habendo máis asuntos que tratar, a Presidencia dá por finalizada a reunión, sendo as doce horas e dez minutos, do que, como secretaria, dou fe.

Pontevedra, na data da sinatura electrónica

A Secretaria da Comisión,  
*(documento asinado electronicamente)*  
Marina Piñeiro Novo

